


TEZAU LITURGIC
1 Iunie

SLUJBA
SF. CUVIOASE
ANIMAISA
SMERTINA
DE LA
OTREŢOVO



MOSCOVA, 2000



СЛУЖБА ПРЕПОДОБНОЙ АНИМАЙСЕ РОДНИКОВСКОЙ И ОСТРЕЦОВСКОЙ

На Господи возвах: стихиры умилительны, гл. 6
Подобен: Всю отложивше:

Анимаисо, мати всечестная, / души моя
крепосте, / надеждо моя и упование, / услыши
стенание и молитву мою. / Настави мя на пути
спасения, / любовь и участием наполни
страждущее сердце, / наставнице благая, / Бога
в Троице любимице всехвальная.

Анимаисо, мати всечестная, / милосердия
сияние, / тепло доброты и мира душевного, /
образе светила во трою единства совершенный в
сердце своем сохраняющая, / буди верным
утешением опечаленных совести моя, / да
откроются и мне, окаянному, пути спасения
истинного. /

Яко во времена власти безбожных веру и
целомудрие невреденны сохранила еси, / тако
и нам даруй ныне целомудрия возвращение, /
избавляя малодушия и бури сомнений, / тьму
нощи омрачения отгони, / и покрова мрака
греховного завесу раздраша, / светом покаяния
озари души наша.

Анимаисо, мати всечестная, / монашествующих
похвало, смиренных утешение, / в бедности

отрадо, в трудах быстрая помощнице,/ в горестех безмездная молитвеннице,/ утиши печали в злостраданиях/ предстательством своим пред Господом Богом нашим.

Слава, и ныне, **глас 2.**

Пречистыя Девы служительнице,/ Анимаисо, мати преподобная,/ бесплодную пустыню сердца моего научай воздѣлывати / непрестанными теченьми слез и въздыханий о гресех моих,/ молю тя, умоли Владычицу мира/ сподобити мя деснаго предстояния / пред Престолом Божиим, /егда сядет судити миру, якоже есть писано.

На стиховне стихиры, глас 6.

Спасе мой, Иисусе Христе,/ Всемиловитый Боже мой,/ приемый блудницу и мытаря оправдавый,/ души моя стремления узри,/ Всеведущий Сердцеведче, /и покаяния моего образ приемля,/ спаси, о, Иисусе,/ от смраднаго обольстителя,/ от зверохищнаго антихриста /и духа вражия тлетворнаго, /разруши сети преисподния/ и спаси мя, Благодателю Святый. Лестию зловредною растлен еси,/ како явлюся Престолу Судии,/ Вечнаго и Нелицеприятнаго,/ но молю о милости прощения, Христе мой Иисусе,/ и зову Ти надеждою:/ молитвами всечестных матери Анимаисы, помилуй мя,

Спасе, грешнаго.

Завистию вражией от Тебя отторгнутый, /
клеветами диавольскими Тя лишенный, /
Милостивый мой Спасителю, / помилуй мое
неразумие, / прости мое маловерие и души моя
пропасти бездонныя зряще, / Сам спаси и
сохрани мя, грешнаго.

Слава, и ныне, **глас тойже: Богородичен.**

Пред Тобою, Царице Небесная, / со слезами и
горестию предстою, / ныне от врага умерщвление
души моя зряще, Пречистая, / и в несчастье
нечестия, аки ризу смрадную, облачение мое, / в
гонениях упование не утративши, /
помилования Пресвятыя Троицы просящи, /
молю Твоего пред Богом предстательства,
Владычице: / врага лютаго избави мя, / услышав
жалобы и стенания души моя, / защитою и
быстрою Помощницею явися измождению
моему, / внемли и вопли непрестанныя услыши, /
и яко Нерушимая Стено веры моя и упования
ставшая, / спаси мя, Приснодево, грешнаго.

Тропари, глас 6: Помилуй нас, Господи, помилуй
нас: Слава: Господи, помилуй нас, на Тя бо
уповахом: И ныне: Милосердия двери отверзи
нам:

КАНОН

Ирмосы канона на недельные гласы.

Запев: Преподобная мати Анимаисо, моли Бога о нас.

Просвещением трисолнечнаго Божества озарившися, / ангельское служение на земли совершила еси, / три ипостаси Богоначальны воспевающа, / молитвами святыми к Человеколюбцу возносящаяся, / в годину лихолетия Бога не отреклася еси, / сиянием силы духовныя тьму безбожия растерзала еси, / ныне же мя, темнотию страстей омраченному, / просвети ко спасению, / светоносную память твою чтущаго.

Совесть имущая к Богу неоскудную / и око сердца чистотою блистающа, / о, мати Анимаисо, Церкви Христовой украшение явилася, / Невестою непорочною Жениху Богу предстояща, / греховныя смерти спасай мя, / яко молитвеннице благая.

Слава:

Зиждемый бысте Богу Духу Святу души твоя оживотворенный храм, / душевное возложиста желание к благовестию, / преподобная наша мати, / страждущия словом утешения укрепляла еси, / малодушия исцеляя, / глада и хлада адскаго отгонительнице, / укроти бурю сердца моего, грехом раздираема, / да в тишине Божией

пребывающа,/ песнями возславлю подвиги твои
и жизнь безконечную.

И ныне:

Из боку чисту Девыя /пройде Солнце правды,/
плотию Пречистою облекшеся,/ осияя вселенную
Триипостаснаго Божества зарями,/ страсти
лютыя ума моего утоли, Владычице,/ и исправи
мя заблудшаго, яко да славлю Тя.

Песнь 3.

Высоту смирения украшаема,/ преподобная
мати Анимаисо,/ с чины небесныя воспевающа
трисвятыми гласы ныне,/ на земли небеса явила
еси послушанием и верностию Богу в Пресвятыя
Троице,/ молитвами, постом и воздержанием
душу божественными дарованиями исполнила
еси,/ о, святая Анимаисо, моли спастися души
моей.

Потоки слезными исполнивше сердце свое
кроткое,/ богомудрая наша мати,/ и плоти
своея умерщвление воздержанием явила еси,/
ныне упроси Бога, молит тя душа моя грешная,/
грехов многих и страстей зверообразных
изцеление низпослати ми/ и души моея
прощение.

Слава:

Дивный образе милосердия являеши/ и
подвигами жития наставляеши,/ к добродетели

и высоте возводяще Божественного делания, /
мати Анимайсо всечестная, / моли Бога
спастися души моя.

И ныне: Богородичен.

Болящим изцеления источаеши, / отгоняя
болезни телесныя и душевныя, / страсти человек
врачуеши, / предстательством преподобныя
мати наша Анимайсы, / даруй ми погибшему
спасение, / Дево Пречистая.

Седален, гл.4

Житейское море бурное преплывше, / образом
благочестия мя наставляеши, / яко ключи храма
Пресвятыя Троицы от врагов сокрыша, / ключи
нерушимого духа миру явила еси, / девственного
подвига печатью истину веры торжествуя, /
пути к Богу в Троице открыла еси, / ключи
Божия Царствия сохраняющая.

Слава, и ныне, **Богородичен:**

Пречистою утробою Твоею Младенца Бога
сокрывающая, / велию тайну Триипостаснаго
Величия соблюди, / Дево, пристанище тихое
безстрастия, / всея вселенныя тишиною
явльшаяся, / потреби тлю сердца моего /
молитвами мати преподобныя.

Песнь 4.

Житие непорочне твое плод премудрости
явистася, / небеснаго жития предвратие
образовашася, / земли дольней преминовение / в
ожидании небеснаго стяжания, / преподобная
мати явила еси во образе ангельстем, / со
безплотными лики взывающа: / слава силе
Твоя, Господи.

К небесному пристанищу устремишася, / мати
наша Анимаисо, / и земный храм Пресвятыя
Троицы своим попечением не оставила еси, /
благоемне украшенный явила по времени, / и
нам, лучами чудес твоих
просвещенными, / испроси у Господа даровати
силу духовную / и решимость подражати житию
твоему, / да согласно с лики ангельскими
воззовем: / слава силе Твоя, Господи.

Слава:

Небесныя надежды стяжати сподобившася, /
земныя печали отложше, аки сорныя, / сподоби
нас добродетелей твоих наследники и общники
быти, / да воспоем с тобою и со ангелы Богу: /
слава силе Твоя, Господи.

И ныне, **Богородичен:**

Блажит Тя, Пречистая, всяк возраст и всяка
душа верных, / Бог бо Слово паче ума от Тебе
воплотися, / сохрани и соблюди люди Твоя, /
Бога в Троице славящия, / молитвами Твоими, /

Дево Пренепорочная.

Песнь 5.

Возсия в тебе Господь, Егоже от всея души
возжелала еси видети / и Ему Единому служити, /
мати Анимаисо прехвальная, / внутренними
очима зряще неизреченную доброту Господа
Бога нашего, / и любви ради Христовой в
острецовской веси вселистася, / непрестанною
молитвою пищи неизреченная сподобилася.
Боже Отче Вседержителю, / Боже Слове и
Божественный Душе, / утверди, Единоначальная
Троице, Твоя певцы, / славящих Тя вкупе с
блаженною Анимаисою и всеми святыми
возвесели, / вся стрелы разжженные лукаваго
потреби.

Слава:

Благодати утешения сподобилася еси, /
преблаженная мати, / сего ради свыше ожидаем
твоего посещения, / настави нас на пути
спасения / и Божественнаго Царствия сотвори
нас причастники.

И ныне:

Воспойте Господеви вся земля, / претворившему
и преобразившему ны от злобы всякия к
добродетели, / соблюдающая вселенную десницею
Своею, / молитвами Девы Пречистыя, / твердою

мира душевнаго надеждою и похвалою.

Песнь 6.

Силою Христовою укрепляема, / мати
всехвальная Анимайсо, / вся коварства лукаваго
низвергла еси, / святыми своими молитвами,
богоблаженная, / Бога Духа Святаго красоту и
доброту в сердце носяща, / и ныне предстоиши
Богу Вседержителю, / у Него же знамения и
чудеса испросивше, / угодница Христова
пресветла явистася.

Небеснаго богатства восприяла, премудрая, /
богомудренными помыслы украсившись, / и яже
на земли отвергша тленная, / к горнему
устремилася еси, / ныне к раце мощей твоих
притекающим / подаваеши изцеления и милости
неоскудныя, / полки же прогоняеши бесовския, /
возвещая небесную радость жития своего.

Слава:

Слава, Господи, всем преподобным и всем
святым, / Божественными повелении Твоими
нравы добродетельны стяжасте, / смирение,
любовь, кротость и незлобие, / сего ради
лукаваго змия умертвиша священными
молитвами, бого-блаженнии, / от Христа Бога
дарования прияли есте, / изцелений дары
смирению просящим подаваете.

И ныне:

Греховныя моя страсти, Пречистая, исцели,
молюся, / Ты же безстрастия источник еси,
Царице Небесная, / и просвети мя Рождеством
Своим, / преподобных молитвы приемлюща.

Кондак, гл.2.

Чистотою души божественне вооружився,
непрестанно молитву, яко копие, приим
державно, разсекла еси демонов полки,
преподобная мати Анимаисо, моли о всех нас
Бога в Троице.

Икос:

Ангельски поживше, преподобная, небесныя
радости причастия сподобилася еси по
скончании. С горних высот призри на ны, ты
величающих: Радуйся, преподобная Анимаисо,
исповедница Христова всечестная!

Песнь 7.

Просветившая сердца и помышления наша, о,
премудрая мати Анимаисо, возводяще к свету
богоразумия, крепость помыслов нам молитвами
твоими даруй, еже хранить и соблюдать
Божественныя заповеди, и всегда пети Богу
верно: благословен еси Боже отец наших.
Пищи небесныя и радости несказанныя ныне

наслаждаешься, мати Анимаисо всехвальная, дольнему миру дары утешения посылаеши, благоуханьми храмы, молящиеся тебе, исполняеши, Духа Божественнаго Святаго излияние призывай песнословящим: отцев наших Боже в Троице благословен еси.

Слава:

Радующеся, поем, Господи, и славим преподобных Твоих собор, совесть имущих чисту и житие непорочно, сего ради воспеваем вси: Отцев наших Боже в Троице благословен еси.

И ныне:

С преподобными девы и матери, Владычице, взывающа к Щедролюбивому Богу, со святыми всеми моли Того присно от всяких бед избавити ны, с любовью Тя величающих, Дево Пречистая.

Песнь 8.

Чудесами дарования болящим изцеления, неплодным чадородия и в трудных обстояниях избавления посылающа, велию помощь небесную являеши еси, усердно молящимся ти с надеждою и верою, преподобная Анимаисо, ты же сподобилася еси жизни будущия, оставление грехов проси нам и болезней прехождение. Подвига монашескаго образе, в чине ангельстем служение на земли свершила еси, ныне празднующи память твою, мати благочестная,

похвалы приносим тебе, праведностию просиявшей, нищих питательнице, убогим заступнице, мужества, мудрости и целомудрия рачительнице, радуйся, угоднице Божия.

Слава:

Исповедница Христова всечестная, преподобная мати Анимаисо, умиленным сердцем Богу в Троице воспевая, славу Божию делами благочестия созидала еси, сего ради молим Человеколюбца: спасай нас, Боже, предстательством Твоих святых.

И ныне:

Царице Небесная и Стено Нерушимая, со всеми пророки и мученики, и преподобными, священномученики и со всеми святыми, молим Тя, Приснодево, народу русскому в горестех и болезнях сущему, Божественную Милость испроси.

Песнь 9.

Процвела еси подвигом постническим, прехвальная Анимаисо, и яко шипок благовонен, и яко ладан благоуханен, верных сердца облагоухала еси. И ныне света Трисолнечнаго наслаждаешься, мати богомудрая, Троичному предстоя Престолу, светозарными зарями просвещенная.

Звездою ясною просияло милосердие твое, мати

преподобная, вселенную осветивше всю и отгнаша тьму злочестия. Видевше ангели подвизи трудов твоих и удивишася, темже и Христос Бог тебе воздаяние и почести дарует, мати преподобная, мы же тя радостно ублажаем.

Слава:

Боже и Свете Трисиянный, озари верою Тя поющих, и от мрачнаго избави злодейства, и сподоби светлейших селений Твоих молитвами преподобных Анимаисы, яко Преплагий.

И ныне:

Божественным Светом зари невечерняя всех песнословящих Тя исполни, Всепетая, молитвами Твоими, да славно Пречистое Твое Владычество во веки.

На хвалитех стихиры, глас 4.

Небеса радуются со ангелы, земля веселится с человеки, Господу Богу славу поюща, милость Его провозвещающа, спасение миру подающему: Боже, помилуй нас.

Со гласы преподобными Триипостасное Божество прославляюща, Владыце Христу и Богу молитву возносим, вернии: спасай нас, Превечный Бог.

Вас молим, преподобнии, Божию Престолу предстоящи, молитесь прилежно Господу

просвещение нам даровати и велию милость.

Слава:

Слава Ты еси, Христе Боже, всякому чину праведных: молитвами их люди Твоя ущедри, подавая нам спасение и сердца тишину.

И ныне:

Поем Препоблагословенную Деву Пренепорочную, в скорбех скорую Помощницу и в болезнях Исцелительницу, Утешительницу Дивную в горестех, Радосте Независтную в радостех. Ты бо еси со всеми преподобными и святыми Престолу Божию наша Предстательнице Небесная, Приснодево Благоуханная.

